

Unammilleqatigiinneq pillugu Inatsisartut inatsisaat malillugu suliffeqarfiit kattunnerannik nalunaaruteqartarneq pillugu Namminersorlutik Oqartussat nalunaarutaat

Unammilleqatigiinneq pillugu Inatsisartut inatsisaanni nr. 1, 15. maj 2014-imeersumi (unammilleqatigiinneq pillugu inatsit) § 17, imm. 3 aamma § 18, imm. 1 naapertorlugit aamma Unammilleqatigiinnermut Ataatsimiititaliaq oqaaseqaateqartereerlugu aalajangersarneqarpoq:

§ 1. Unammilleqatigiinneq pillugu inatsimmi § 17, imm. 1 malillugu suliffeqarfiit kattunnerat suliffeqarfimmit ataatsimit arlalinnilluunniit kattunnermi peqataasunit Atuisartoqarnermut Unammilleqatigiinnermullu Aqutsisoqarfimmut nalunaarutigineqassaaq.

Imm. 2. Atuisartoqarnermut Unammilleqatigiinnermullu Aqutsisoqarfimmut qarasaasiakkut nalunaaruteqartoqartoqarsinnaavoq. Taamaattoqarpat ilanngussat 1 aamma 2 naapertorlugit immersugassami kattunnermik nalinginnaasumik pisariitsumillu nalunaaruteqarnermut atugassami inuup nammineq atsiornera elektroniskimik atsiornerep taarsissavaa. Uppernarsaatit assilineri ilanngunneqarsinnaapput.

§ 2. Kattunneq nalinginnaasumik pisariitsumilluunniit nalunaarutigineqarsinnaavoq.

Imm. 2. Kattunnermik nalinginnaasumik nalunaaruteqarnermi taassuma assinga isertuussassaanngitsoq ilanngunneqassaaq aammalu paasissutissanik uppersaatinillu immersugassami ilanngussaq 1 naapertorlugit kattunnermik nalinginnaasumik nalunaaruteqarnermut atugassami allassimasunik imaqassalluni.

Imm. 3. Kattunnermik pisariillisakkamik nalunaaruteqarnermi taassuma assinga isertuussassaanngitsoq ilanngunneqassaaq aammalu paasissutissanik uppersaatinillu immersugassami ilanngussaq 2 naapertorlugit kattunnermik pisariitsumik nalunaaruteqarnermut atugassami allassimasunik imaqassalluni.

§ 3. Kattunnermi immikkoortut uku pisariillisamik nalunaarutigineqassapput:

1) Kattunnerit suliffeqarfiit marluk arlalilluunniit joint venturenik Kalaallit Nunaanni niuernermit ingerlatsiviusussaanngitsumi annikitsuinnarmilluunniit ingerlatsiviusussami ilimagi-neqartumilluunniit ataatsimut aqutsivigisaanni. Tamanna imatut pisoqarpat atuuppoq:

a) joint venturemi kaaviiartitat imaluunniit ingerlatani nuunneqartuni kaaviiartitat Kalaallit Nunaanni 50 mio. koruunit ataappagit, aamma

b) pigisat imaluunniit pigisat atorlugit kaaviiartitat joint venturemut nuunneqartut Kalaallit Nunaanni katillugit 50 mio. koruunit ataallugit naleqarpata.

2) Suliffeqarfik suliffeqarfimmik suliffeqarfik ataaseq arlallilluunniit peqatigalugit oqartussaaffigisaminik kisimiilluni oqartussaalerluni kattunnerit.

3) Suliffeqarfiit marluk arlallilluunniit kattunnerat imaluunniit suliffeqarfiup ataatsip arlallilluunniit suliffeqarfimmi ataatsimi allami kisimiillutik ataatsimoorlutilluunniit oqartussaalerlunerat, aamma:

a) kattunnermi peqataasut arlaannaalluunniit niuerfimmi ataatsimi tunisassianik niuerfimmi nunallu ilaani niuerfimmi ataatsimi ingerlataqanngitsut imaluunniit niuerfimmi kattunnermi peqataasup ataatsip allap tunisassianik niuerfimmu ingerlaqqarfigisaanut tunngatillugu tamassuma siorna tamassumaluunniit kingorna tunisassianik niuerfimmi ingerlataqanngitsut,

b) kattunnermi peqataasut marluk arlallilluunniit tunisassianik niuerfimmi nunalluunniit ilaani niuerfimmi ataatsimi Kalaallit Nunaanni niuernermut tamarmiusumut sanilliullugit katillugit 15 procentit ataallugit annertugisut, imaluunniit

c) kattunnermi peqataasoq ataaseq arlallilluunniit tunisassianik niuernermi kattunnermi peqataasup allap ingerlatsiffigisaanut tunngatillugu tunisassianik niuerfimmi tamassuma siorna tamassumaluunniit kingorna ingerlatsisut, siusinerusukku kingusinnerusukkulluunniit niuernerni ataasiakkaarlutik katillutilluunniit Kalaallit Nunaanni kaaviiartinneqartartunut sanilliullugu kaaviiartitaat 25 procentinik amerlanerusunilluunniit annertussuseqanngippata.

Imm. 2. Kattunneq imm. 1-imi immikkoortumut ataatsimut ilaagaluarpalluunniit kattunnerup nalinginnaasumik nalunaarutigineqarnissaa Atuisartoqarnermut Unammilleqatigiinnermullu Aqutsisoqarfiup piumasarisinnaavaa, tak. § 2, imm. 2.

§ 4. Kattunneq § 2, imm. 2 naapertorlugu nalinginnaasumik nalunaarutigineqarpat, nalunaarut tamakkiisuunersoq nalunaarutip tignerani kingusinnerpaamik ulluinaat qulit qaangiunneranni Atuisoqarnermut Unammilleqatigiinnermullu Aqutsisoqarfiup nalunaarutigissavaa. Nalunaarut tamakkiisuunngitsutut Atuisoqarnermut Unammilleqatigiinnermullu Aqutsisoqarfik isigalugu aalajangerpat, suut paasissutissiisutigineqassanersut aqutsisoqarfik piffissarititap taassuma naannginnerani tamanna pillugu nalunaaruteqassaaq. Nalunaarut aatsaat ullormi Atuisoqarnermut Unammilleqatigiinnermullu Aqutsisoqarfiup paasissutissanik piu-maneqartunik tigusiiffigisaani tamakkiisuulissaaq.

Imm. 2. Kattunneq § 2, imm. 3 naapertorlugu pisariillisakkamik nalunaarutigineqarpat nalunaarutip tignerani kingusinnerpaamik ulluinaat qaangiuppata nalunaarut tamakkiisuusutut isigineqassaaq, kattunnerup nalinginnaasumik nalunaarutigineqarnissaa tamassuma siorna annertunerusunik paasissutissiinissaanik pillugu Atuisoqarnermut Unammilleqatigiinnermullu Aqutsisoqarfiup ilisimatitsissutigisimanngippagu. Atuisoqarnermut Unammilleqatigiinnermullu Aqutsisoqarfiup nalunaaruteqartoq ulluinaat qulit taakku iluanni qinnuivigisinnaavaa. Taamaattoqarpat nalunaarut ullormi paasissutissat tigneranni, tamakkiisuulissaaq, kisiannili pisariillisakkamik nalunaarutip tignerani kingusinnerpaamik ulluinaat qulit qaangiunneranni.

Imm. 3. Nalunaaruteqarnermi immersugassami paasissutissat allassimasut ilaat paasissutissiisutigineqarsimanngikkaluartut, § 2, imm. 2 aamma 3 malillugit tamakkiisumik nalunaaruteqarnerup assigissagaa nalunaaruteqartup qinnuteqaatigisinnaavaa. Taamatut qinnuteqaate-qarnermi paasissutissat kattunnerup nalilersorneranut pisariaqannginnerannik tunngavilersuut

ilanngunneqassaaq.

Imm. 4. Pisariillisakkamik nalunaarut tamakkiisutut isigineqaraluartoq, kattunneq sulii akuerineqarsimatinnagu, kattunnerup § 2, imm. 2 naapertorlugu nalinginnaasumik nalunaarutigineqarnissaa Atuisoqarnermut Unammilleqatigiinnermullu Aqutsisoqarfiup piumasarisinnaavaa.

§ 5. Kattunnerup pisariillisakkamik nalunaarutigineranut akitsuutit 50.000 kr. Akilerneqassapput.

Imm. 2. Kattunnerup tamakkiisumik nalunaarutigineqarneranut akitsuutit suliffeqarfiit peqataasut Kalaallit Nunaanni kaaviiartitaasa 0,015 procentiinik annertussuseqartut akilerneqassapput, annerpaamili 1,5 mio. kr.

§ 6. Unammilleqatigiinnermut Ataatsimiititaliaq isumaqarpat, ingerlatsineq nalunaarutigineqartoq unammilleqatigiinneq pillugu inatsimmi § 16-imut, tak. §15, imm. 1, ilaanngitsoq ataatsimiititaliap nalunaaruteqartoq tamanna pillugu nalunaarfigissavaa. Tamassuma kingorna kingusinnerpaamik sapaatit akunneri sisamat qaangiunneranni nalunaarutigineqartup unammilleqatigiinneq pillugu inatsimmi § 8, imm. 1, oqaaseqatigiit siulliat, § 9, imm. 1, oqaaseqatigiit siulliat, § 11, imm. 4, imaluunniit § 11, imm. 5, oqaaseqatigiit siulliat malillugit suliarineqarnissaa qinnuteqaateqartoq Unammilleqatigiinnermut Ataatsimiititaliamut qinnuteqaate-qarsinnaavoq.

Imm. 2. Ingerlatsineq unammilleqatigiinneq pillugu inatsimmi § 8, imm. 1, oqaaseqatigiit siulliat, § 9, imm. 1, oqaaseqatigiit siulliat, § 11, imm. 4, oqaaseqatigiit siulliat imaluunniit § 11, imm. 5, oqaaseqatigiit siulliat malillugit nalilersorneqarnissaanut tamanna pisariaqarpat nalunaaruteqarneq paasissutissanik ilaneqassasoq Unammilleqatigiinnermut Ataatsimiititaliap piumasarisinnaavaa. Taamaattoqarpat piffissami ingerlatsinerup kattunnertut nalunaarutigineqarnerata tigunerani nalunaarut tiguneqartutut isigineqassaaq.

§ 7. Nalunaarut manna atuutilissaaq ulloq 1. aprili 2016.

Namminersorlutik Oqartussat, ulloq 10. marts 2016

Vittus Qujaukitsoq

/

Jørn Skov Nielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut